

La Storie de Fieste

Tal **1977**, nûfcentésim aniversari dal diplome di Indrì IV, e fo celebrade a Aquilee la prime edizion de Fieste de Patrie dal Friûl. Ideadôr e grant protagonist de edizion di scree al è stât pre Checo Placerean, che dopo i fo intitulât l'“Istitût Ladin Furlan”, l'ent che par agns al à coordinât i events celebratîfs.

Di in chês volte, intai dîs de "Fieste", su dut il teritori furlan a vegnin fatis diversis manifestazions che si sierin intun unic event celebratîf organizât ogni an intun comun diferent dal Friûl.

Tacant dal **2002**, an che la fieste e je stade fate intal comun di Dael, la manifestazion e à otignût la adesion uficiâl des ex provinciis di Gurize, Pordenon e Udin, des trê diocesis furlanis e de Regjon Friûl – Vignesie Julie, cjapant sù un significât unitari e unificadôr pal teritori de Patrie dal Friûl. A partecipin aes variis iniziativis organizadis pe ricorence anuâl ancje i Comuns cjâfluc dal Friûl e l'Ufici Scolastic Regjonâl, cun tancj ents locâi e realtâts associativis dal teritori.

Lis edizions sucessivis de Fieste de Patrie dal Friûl si son fatis:

- a Pantianins intal 2003;
- a Spilimberc intal 2004;
- a Davâr intal 2005;
- a Cormons intal 2006;
- di gnûf a Aquilee intal 2007;
- a Cordovât intal 2008;
- a Buie intal 2009;
- a Lucinîs intal 2010;
- a Manià intal 2011;
- a Cjarlins, Muçane e Sant Zorç di Noiâr intal 2012;
- a Dolegne intal 2013;
- a Cjavàs, Fane e Midun intal 2014;
- a Cividât intal 2015.

Il **2015** al è stât l'an che al à viodût ricognossude uficialmenti de bande de Regjon la Fieste de Patrie dal Friûl, in graciis de aprovazion de **leç n. 6 dai 27 di Març**: il so obietîf al è chel di ricuardâ e valorizâ lis origjins, la culture e la storie di autonomie dal popul furlan.

Daûr dai articui de Leç, la “Fieste de Patrie dal Friûl” e previôt la organizazion di une cerimonie publice là che a vegnin ricognossûts i valôrs civîi e culturâi che, ancjemò vuê, a caraterizin la identitât furlane. Ogni an a vegnin metûts dongje ents e scuelis par fâ ativitâts cul fin di sensibilizâ i zovins su lis tematichis de autonomie e de identitât.

Cun di plui, in atuazion des normis previodudis in cheste Leç, la **Agjenzie Regjonâl pe Lenghe Furlane**, intal ambit dal program anuâl aprovât de Zonte regjonâl, e promôf la realizazion di manifestazions culturâls pe celebrazion de “Fieste de Patrie dal Friûl” di bande di ents locâi in colaborazion cu lis Pro Loco e altris sogjets publics e privâts cence fins di vuadagn o a finalitâts mutualistichis.

Dopo dal 2015 lis edizions si son davueltis:

- a Gardiscje intal 2016
- a Sapade intal 2017
- a Voleson Darzin intal 2018
- a Gurize intal 2019
- a Udin intal 2021
- a Vît intal 2022

La edizion dal 2020 e je stade anulade dilunc de emergjence sanitarie di Covid-19.

La edizion 2021, programade ai 3 di Avrîl, e je stade rinviade dilunc de emergjence sanitarie di Covid-19 e des normis di chel moment. Si è tignude une piçule celebrazion private, cun dome lis autoritâts, indulà che e je stade esponude la bandiere su la specule dal cjistiel di Udin.

La celebrazion publice si è tignude duncje ai 12 di Setembar a Udin, ae presince del autoritâts e de citadinance.

La edizion 45^e si e tignude di gnûf in presince inte zornade di domenie ai 3 di Avrîl dal 2022 a Vît.